

Praticamain tut ils Rumantschs èn bilings

Studi dà al rumantsch mo pli paucas schanzas

■ (Iq) Ils cunfins linguistics en Svizra èn stabils. Unicamain ils cunfins fix dal rumantsch as han schliats: Per blers Rumantschs è oz il tudestg la lingua da mintgadi, scu che mussa in studi publitgà ier da l'Uffizi federal per statistica. Il studi, che ha analisà il svilup da las quatter linguas naziunalas en il decurs dals ultims desch onns, mussa cleramain che il rumantsch vegn discuri plitgusch da glied pli veglia, tar la populaziun pli giuvna è il rumantsch sutpreschentà. Ils linguists nu pon perquai far auter che ina prognosa pauc favuraivla pel rumantsch, sco che i ha nom en ina comunicaziun da pressa. Tuttina dettia la pussaivladad che il rumantsch daventia puspè pli ferm: En vischnancas nua che il rumantsch è lingua d'instrucziun en la scola primara saian vegnidas registradas procentualas sur la media en il diever dal rumantsch.

0,6 u 1 procent?

Las cifras ch'èn enconuschentas già pli lung èn vegnidas crititgadas già avant quatter onns da la Lia rumantscha. La

LR avaiva valità quella giada las repostas sin ina dumonda ulteriura en la dumbraziun dal pievel vegnind sin il resultat da var 1 procent da personas che discurren rumantsch en Svizra e betg mo 0,6 procent.

Il studi constatescha er che la Svizra va en direcziun da la plurilinguità. Var trais quarts dals Rumantschs specifitgeschan da duvrar sper la lingua principala anc ina segunda lingua. En il territori talian èn ca. la mità bilings, En il territori franzos mo in quart.

Tudestg ed engles domineschan

Ina rolla pli e pli importanta gioga l'engles ch'è vegni inditgà scu lingua discurrida da 15 procent da la populaziun en la vita activa. En singulas gruppas da lavur ragiunscha l'engles ils 30 procent.

Il tudestg è e resta il linguatg il pli important en Svizra. Tenor la dumbraziun dal pievel dal 1990 discurren passa 63 procent tudestg. Il franzos segua cun stgars 20 procent, entant che il talian ha pers in zich da sia importanza; el vegn dovrà da var 7,5 procent da la populaziun svizra.



Tar nus è la bilinguitad normalitad en il mintgadi. LO